

Pendicularas Scuol SA sun sülla dretta via

Las Pendicularas Scuol SA han fat l'on da gestiun 2022/23 ün schmerdsch da record. Il quint final positiv pussibiltescha da pudair realisar il nov stabilimaint cun restorant e garaschas a Motta Naluns.

FADRINA HOFMANN

Scha tuot va tenor plan ha lö l'avertüra dal nov restorant pro la staziun da muntogna a Motta Naluns pel cumanzamaint da la stagiun d'inviern 2024. I's tratta d'ün stabilimaint da lain sün ün plan, elavurà dal büro d'architectura Fanzun cun fanestras otas chi permettann üna stupenda vista süllas muntognas ed üna gronda terassa. Previs esa eir da pudair dovrar üna part sco sala polivalenta. In marcurdi han in fuormà il directer da las Pendicularas Scuol SA Andri Poo ed il president Andri Linsel davart ils plans pel nov restorant e las novas garaschas.

«Nus vain ün zichin retard causa discussiuns a regard cuosts e finanzas», ha dit Andri Poo. Intant han cumanzà las lavuors pel stabilimaint daspera chi dess dar üna nouva butia cun lö da service. L'idea es da cumanzar cun sbodar il stabilimaint vegl apaina cha la stagiun finischa als 7 avrigl 2024. Ses eivnas düraran quellas lavuors e lura as poja cumanzar a fabricar il nov stabilimaint. La gestiun da la pendiculara resta eir dürant il temp da fabrica, schabain eir cun tschertas restricziuns dals uraris. Previs esa eir da s-chaffir üna sporta da restauraziun i'l territori da skis durant la stà 2024. 50 fin 60 pertschient da las lavuors sun fingià surdattas.

Ün oblig invers ils giasts

La finanziaziun dal proget es sgürada. Ils cuosts s'amuntan a 19,2 milliuns francs. 12 milliuns vegnan finanziaziun cun ün credit da banca, trais milliuns francs dessan gnir finanziaziun cun ün augmoint da chapital e quatter milliuns francs pon las Pendicularas Scuol SA pajar svesta e cun aignas prestaziuns. «Id es üna sfida perquai chi nu's riva da guadagnar blers raps cun restauraziun, ma id es üna sporta chi tocca pro l'irculs skis», ha dit Andri Linsel. Il stabilimaint actual es 50 ons vegl. «Nus investissan plü jent in s-chabelleras co far

garaschas e restorant, però nus vain ün oblig da realisar quist proget», ha declerà il president.

In occasiun da la conferenza da medias ha Andri Linsel güsta amo preschantà il rendaint 2022/23. Adonta chi ha dat paca naiv l'inviern passà d'eiran las frequenzas fich otas. 320 401 prümas entradas sun gnüdas registradas durant la stagiun d'inviern, Cun ün schmerdsch da 16,273 milliuns francs ha dafatta pudü gnir battü il record da l'on passà. Las Pendicularas Scuol SA han fat 250 000 francs daplü schmerdsch co l'on avant. Tenor ils

rapports actuals dad otras pendicularas in Grischun han gnü quellas daimain schmerdsch co l'on passà. «Nus eschan cuntaints e superbis da nos resultat, impustüt in quists ons cha nus vain grondas investiziuns», ha dit il president.

Ün prodot dumandà

Il quint final es egualisà, dimena ingün guadogn ed ingüna perdita. «Grazcha als buns resultats vaina survgni il credit da banca da 12 milliuns francs per pudair fabricar il nov stabilimaint», ha intunà Andri Linsel. Las cifras muos-

san cha'l prodot sülla muntogna saja dumandà ed haja avegnir.

La radunanza generala da las Pendicularas Scuol SA ha lö als 7 october. La tractanda principala sarà l'augmoint da chapital. Implü gnaran las acziunarias ed acziunaris dumandats da nu pajar oura dividendas, dimpersè dad investir inavant illa sporta sülla muntogna. La radunanza generala sarà eir ün'occasziun da tour cumgià da la Charpenna.

Innaiver e sgürezza han priorità

Progets da las Pendicularas Scuol SA pel avegnir pertoccan rimplazza-maints

dad indrizs d'innaiver, i dessan gnir rimplazzats ils duos runals da Champatsch ed i sto gnir instradà ün process fuormal per pudair innaiver Champatsch.

Implü vain elavurà ün dispositiv plü grond pella sgürezza da lavinas a Mot da Ri. Il böt es da pudair minar il territori eir schi'd es trid'ora. Il proget da schlargiamaint Tiral es pel muaint sisti. Cul proget da Scuol Solar nun ha las Pendicularas Scuol SA invezza dachefar nüglia. Tuot tenor profitess ella d'ün access direct a la forza electrica.



Il directer da las Pendicularas Scuol SA Andri Poo preschainta ils plans pel nov stabilimaint pro la staziun da muntogna. Quist stabilimaint es gnü elavurà da Fanzun Architects.

fotografias: Fadrina Hofmann/Fanzun Architects

Mozart es stat in visita a Sent

Il prüm concert dal Quartett Stradivari ha gnü lö in lündeschdi passà illa baselgia a Sent. La musicista ed ils trais musicists han sunà ouvas da Wolfgang Amadeus Mozart cun ligerezza e paschiun.

Il Quartett Stradivari consista da Xiaoming Wang (violina), Stefan Tarara (violina), Lech Antonio Uszynski (viola) e da Maja Weber (violonchello). Els fan fingià daspö divers ons visitas in Engiadina Bassa, quist on cun quatter concerts, adüna cun ün oter program.

La FMR ha visità il prüm concert illa baselgia a Sent cun ouvas da Wolfgang Amadeus Mozart (1756-1791). Davo ils concerts vain adüna sport ün aperitiv e las audituras ed audituors han la pussibilità da tour part ad üna tschaina cumünai. Divers hotels spordschan a lur giasts eir pensiu plaina cun entrada cun plazzas reservadas als quatter concerts dal quartet. Il Quartett Stradi-



Il Quartett Stradivari in plaina concentrasiun illa Baselgia San Lurench a Sent.

fotografia: Benedict Stecher

vari es üna gruppa da musicista e musicists da qualità suprema e chi suna cun precisium sorprendenta, cun ligerezza e fö. La sairada musicala a Sent sainza moderaziun ha sport ün concert cun gronda omogenità dals instrumaints e cun üna dinamica fich variada.

Musica d'ota qualità

Illà baselgia a Sent regnaiva in lündeschdi vers saira, pro la premiera dals quatter concerts in Engiadina, ün'atmosfera da bun anim cun grondas aspettativas chi sun lura eir gnüdas accumuladas. Il prüm toc, nomnà

Il quartet va pel muond

Seis debüt ha il Quartett Stradivari festagià pro'l prüm concert illa Tonhalle Zürich dal 2007. Intant han ils quatter musicists ragiunt ün nom excellent ed han sunà daspö là sün diversas turneas e cun concerts in Svizra e sur cunfin: a Londra, Berlina, Vienna, Hamburg, New York, Tokio, Shanghai, Singapur, Lucerna in salas da concert o pro festivals. Remarchablas sun las festas Stradivari cun var 60 concerts l'on in Svizra ed utrò. Il quartet dispuona d'ün repertuar fich vast, el as dedichescha eir a cicles tematics obain stagiunalmaint ad ün cumponist.

(fmr/bcs)

«Streichquartett» o eir «Preussisches Quartett» in quatter parts ha manà l'auditori in ün stadi da fascinaziun. La musicista ed ils musicists han sunà cun lur quatter instrumaints a corda cun üna precisium ed ün respet cumünai chi segnan d'ota qualità. Eir l'intunaziun

dals instrumaints, fatta be tenor l'udida, es statta precisa ed optimala. Pitschens segns cul cheu ed ün tour regard vicendaivel han funcziunà eir pro riterdandos, pro passaschas calmas o furiusas – cun ün spectrum remarchabel.

Perfin «Happy birthday»

Eir il seguond toc, eir quel da Wolfgang Amadeus Mozart, nomnà «Dissonanzenquartett», ha dat illas quatter parts dal toc als musicists la pussibilità da muosar lur savair cun pitschens solos. Impustüt la quarta part ha satisfat, il «Allegro molto» ha muosà l'indschegn da la dainta chi'd es siglida cun üna spediuziun extrema ed istess cun precisium remarchabel sur las cordas.

Ils preschaints sun propi stats inchantats da la sporta madüra. Ed il public ha remunerà la prestaziun musicala cun grond applaus. Cun quai ch'ün dals audituors vaiva quel di anniversari, ha il quartet sunà sco supplement il «Happy birthday», interpretà in möd unic. Sco cha'ls interprets han dit unisono sun lur concerts in Engiadina Bassa per els fich specials.

Benedict Stecher/fmr